

COMENTRIO

CONCURSO DI CALYPSO A DESCEPCIONA

Skirbi pa Juby Naar

Un descepcion grandi e concurso di calypso y roadmarch a resulta di ta diasabra anochi, cumisando cu 2 ora di retrazo, yena cu problemanan tecnico y tardanzanan fuera di proporcion, combina cu situacionnan imprevisto cu a presenta nan mes, lagando no solamente e publico, pero kizas cada persona involvi mes, cu un descepcion grandi.

E prome problema grandi a presenta su mes for di merdia caba cu trahamento di e parti ariba di escenario, cu despues pa seguridad mester a wordo modifica.

Pa haci e modificacion aki a trece cune problemanan tecnico electrico, cu un cable importante a wordo dañá, poniendo cu ta den laat atardi a cuminza traha riba e sistema tenico di sonido.

E cantidad di equiponan di sonido y e uso di equiponan moderno musicalmente, a bin resulta despues tambe un trabao inmenso pa techniconan, pa nan por a regula sonido di cada un di e agrupacionnan manera debe ser.

Aki mester bisa cu "e tecnico Mericano riba escenario, a traha mas duro cu un burico di carga", cu un pasenshi enorme, haciendo tur lo posible pa por a complace un y tur, pero e situacion a haci cu no por a haci mihor.

E trabao di instalacion di equiponan a bini cla alrededor di 9.30 di manera cu e programa a cuminza 9.45 or y cu e prome grupo, esta "Tippaman" habriendo e concurso pa 9.55 or.

Na e momento ey e di dos agrupacion tabata riba escenario caba, "Grasshoppers" pero no por a haci "sound test" te despues di presentacion di Tippaman.

Ora cu Tippaman a caba, e tecnico mester a haci instalacionnan tecnico pa Grasshoppers, percurando pa cada instrumento tabata tin su microfono y cu cada microfono ta funciona debidamente. (esaki ta algo cu cada agrupacion ta exige prome cu nan toca)

Pa motibo di e comienzo den pura debi na tempo, a tarda den e preparacion aki, y ora cu el a tuma lugar e di dos tardanza di anochi a tuma lugar.

Grasshoppers sinembargo a cuminza nan "warmup" sin cu nan a logra "soundtest" y tabata durante nan presentacion cu un pa un di e microfononan a wordo regula, y cu poco poco a cuminza mehora, pero e ora ey tabata laat caba y no por a remedia e asunto di tardanza mas.

Hopi factor imprevisto a yuda conduci tambe na e tardanzanan cu no por tira culpa riba equiponan di sonido, tecnico, etc. so.

Di tur banda tabata tin errornan cometi y di lamenta tabata cu e publico mester a keda descepciona cu e anochi, pero lo no ta justo pa culpa solamente e parti tecnico, of culpa e Comité Organizador, of culpa ASOMA, ni culpa SAC.

E desarollonan di ultimo simannan, e cambiamentonan di fecha, e forza cu e Comisión Organizador a haya nan mes cune pa organiza e concurso den un tempo relativamente corto cu por considera hasta un record, problema di logra escenario na tempo -- cu bon colaboracion di Coastal, -- entre otro a contribui na e situacion di Diasabra anochi.

Publico a keda descepciona pero cu comprension a acepta e suspension.

Sigur ta cu musiconan, cantantenan, managernan di banda, maestronan di ceremonia, ASOMA, SAC y Comisión Organizador no tabata satisfecho "at all" cu e anochi, pero tur a haci lo maximo pa trata na cambia e ambiente "scur" cu a cuminza cune.

E anochi aki sigur ta "un les" no solamente pa e Comisión Organizador (cu kizas lo no tey mas despues di e dos concursionan grandi), SAC y ASOMA, pero pa tur organizacion riba nos isla.

Ora ta organiza, organiza manera debe ser y no den pura. Percura pa tur locual tin di haber cu e actividad ta cla 100 por ciento pa e ora stipula. Evita descepcion, sigur ora tin un publico cu ta paga pa e actividad.